

## INNFLUTNINGUR KATTA FRÁ LANDI Í LANDAFLOKKI 2

Eftirfarandi eru leiðbeiningar um innflutning katta til Íslands frá eftirfarandi viðurkenndum útflutningslöndum í landaflokki 2: Bandaríkin, Bosnía-Hersegóvina, Grænland, Kanada, Pólland, Rúmenía, Serbía, Slóvakía, Taívan, Tyrkland, Ungverjaland. Nauðsynlegt er að kynna sér vel innflutningsskilyrði áður en undirbúningur innflutnings hefst. Mælt er með að prenta út [vottorðseyðublað C2](#) og kynna sér það vel og hafa leiðbeiningar þessar til hliðsjónar.

Innflutningsleyfi útgefið af MAST skal liggja fyrir áður en kötturinn er fluttur til landsins. Innflytjandi ber ábyrgð á að öll innflutningsskilyrði séu uppfyllt. Séu skilyrði ekki uppfyllt við innflutning getur það haft þær afleiðingar að kötturinn verði sendur tafarlaust úr landi.

- Kötturinn skal hafa dvalið í landi í viðurkenndu útflutningslandi frá fæðingu eða í a.m.k. 6 mánuði fyrir innflutning til Íslands. Kettir frá landaflokki 2 geta uppfyllt skilyrði í yngsta lagi um 7 mánaða gamlir.
- Dýralæknir sem hefur læknisleyfi í útflutningslandi skal framkvæma allar læknismeðferðir sem uppfylla þarf vegna innflutnings, hvort sem um ræðir bólusetningar, sýnatökur, meðhöndlunir eða heilbrigðisskoðun.
- Eingöngu það vottorðseyðublað (C2) sem útgefið er af MAST vegna innflutnings er tekið gilt.
- Útfyllt og undirritað vottorð ásamt fylgiskjölum skal sent til MAST 5-10 dögum fyrir innflutning til samþykktar.
- Berist tilskilin gögn Matvælastofnun síðar en 5 sólarhringum fyrir áætlaðan komudag er stofnuninni heimilt að synja innflutningi dýrs.
- Leiðbeiningar þessar byggja á [reglugerð nr. 200/2020 um innflutning hunda og katta](#) með áorðnum breytingum.

### 1. Umsókn um innflutningsleyfi – greiðsla eftirlitsgjalds

- Fyrsta skrefið í innflutningsferlinu er að sækja um innflutningsleyfi í [þjónustugátt](#) MAST. Nota skal rafræn skilríki eða íslykil við innskráningu. Þeir sem búsettir eru erlendis og/eða hafa hvorki rafræn skilríki né íslykil geta notað [enskt umsóknareyðublað](#). Eyðublaðið skal fyllt út, undirritað og sent til [petimport@mast.is](mailto:petimport@mast.is).
- Æskilegt er að umsókn berist Matvælastofnun a.m.k. 30 sólarhringum fyrir fyrirhugaðan innflutning.
- Upplýsingar um útflutningsland, kattartegund og örmerki kattar skulu liggja fyrir þegar sótt er um innflutningsleyfi.
- Þegar umsókn hefur borist Matvælastofnun fær umsækjandi reikning í heimabanka vegna eftirlitsgjalds. Gjaldið er vegna umsýslu, innflutningseftirlits á Keflavíkurflugvelli og útskriftarskoðunar í einangrun, samtals 3 vinnustundir. Athugið að hér er um að ræða lágmarksgjald sem miðast við að fullnægjandi gögn séu lögð fram innan viðeigandi tímaramma. Sé svo ekki getur það haft aukinn kostnað í för með sér og innheimt er fyrir slíkt skv. tímagjaldi. [Gjaldskrá Matvælastofnunar](#).
- Þegar greiðsla berst, er innflutningsleyfi gefið út. Innflutningsleyfið er háð þeim skilyrðum að kötturinn uppfylli öll skilyrði vegna innflutnings skv. reglugerð nr. 200/2020.
- Innflutningsleyfið, sem gefið er út á ensku, gildir í eitt ár frá útgáfu þess.

### 2. Einangrun

- Allir kettir skulu dvelja að lágmarki 14 daga í einangrun.
- Innflytjandi skal sjálfur sækja um pláss í einangrunarstöð með góðum fyrirvara.
- Taka þarf mið af heilbrigðisskilyrðum (tímarestum o.þ.h.) þegar innflutningsdagsetning er ákvörðuð.
- Á Íslandi eru tvær samþykktar einangrunarstöðvar fyrir hunda og ketti:
  - [Einangrunarstöðin í Reykjanesbæ](#) (Höfnum) – s. 421 6949 / 893 6949
  - [Einangrunarstöðin Mósel](#) (Hellu) – s. 868 3360
- Öll dýr sem dvelja samtímis í einangrunarstöð skulu innrituð á þriggja daga tímabili.
- Upplýsingar um komudaga/innritunardagsetningar má finna á vefsíðu viðkomandi einangrunarstöðvar.
- Vakni grunur um alvarlegan smitsjúkdóm í dýri í einangrun er Matvælastofnun heimilt að framlengja dvalartíma, ýmist allra dýra eða eingöngu þess dýrs sem við á og fer það eftir eðli smitefnis.

### 3. Heilbrigðiskröfur – heilbrigðis- og upprunavottorð (C2)

Mikilvægt er að huga snemma að þeim kröfum sem gerðar eru um bólusetningar, sýnatökur o.fl. þar sem tiltekinn tími þarf að líða frá því að bólusett er og þar til flytja má köttinn til landsins, auk þess sem sýnatökur vegna rannsókna skulu gerðar innan tiltekins tímaramma.

Nota skal [vottorðseyðublað C2, Certificate of health and origin for imprt of a cat to Iceland from a category 2 country](#). Vottorðið skal gefið út og undirritað af dýralækni í útflutningslandi. Allir reitir (nema part 11) skulu fylltir út, dagsettur og undirritaðir þar sem við á.

The image shows two pages of a 'Certificate of Health and Origin' form for cats. The left page is the front side, titled 'CERTIFICATE OF HEALTH AND ORIGIN FOR EXPORT OF A CAT TO ICELAND FROM A CATEGORY 2 COUNTRY'. It contains sections for: 1. Identification and details of the cat (name, sex, color, breed, etc.). 2. Vaccination and health status (rabies, other diseases, etc.). 3. Health examination and laboratory tests (blood, feces, etc.). 4. Official stamps and signatures. The right page is the back side, containing sections for: 1. Health examination and laboratory tests (rabies, other diseases, etc.). 2. Official stamps and signatures. Both pages have a 'Page 1 of 1' and 'Page 2 of 1' label at the bottom right.

**Eftirfarandi eru skýringar fyrir hvern hluta („part“) af vottorðinu. Sjá yfirlitstöflu með heilbrigðisskýrðum á s. 5.**

- **Part 1: Upplýsingar um innflytjanda.** Samræmi skal vera milli upplýsinga í vottorði og á leyfisbréfi.
- **Part 2: Upplýsingar um kött, auðkenni hans og útflutningsland.** Dýralæknir skal staðfesta örmerki kattarins og skrá dagsetningu örmerkingar eða aflestrar merkis. Örmerkisnúmer skal staðfest af dýralækni í hvert sinn sem meðhöndlun eða sýnataka vegna innflutnings fer fram. Örmerkið skal uppfylla ISO staðla. „Import permit no.“ er númer innflutningsleyfis útgefið af MAST. Útflutningsland skal tilheyra landaflokki 1.
- **Part 3: Yfirlýsing eiganda / umráðamanns kattar í útflutningslandi.** Með undirritun sinni staðfestir eigandi / umráðamaður kattar eftirfarandi: að kötturinn hafi dvalið í landi í viðurkenndu útflutningslandi frá fæðingu eða í a.m.k. 6 mánuði fyrir innflutning og að við innflutning þurfi kötturinn ekki sérstaka lækni meðferð og að læður séu hvorki kettlingafullar né mjólkandi.
- **Part 4: Upplýsingar um áætlaðan komutíma, flugnúmer og einangrunarstöð.**
- **Part 5: Bólusetningar**
  - **(a) Hundaeði (rabies): bólusetning og mótefna mæling.** Kötturinn skal hafa gilda bólusetningu gegn hundaeði, þ.e. hafa hlotið viðeigandi grunnbólusetningu og henni viðhaldið skv. leiðbeiningum framleiðanda bóluefnisins. Bólusetningin skal vera í gildi, þ.e. ekki runnin út þegar mótefna mæling er framkvæmd. Taka skal blóðsýni vegna mótefna mælingar í fyrsta lagi 30 dögum eftir bólusetningu. Dagur bólusetningarinnar er dagur 0 (núll).

Mótefnamæling skal framkvæmd af [rannsóknarstofu sem viðurkennd er af Evrópusambandinu](#) í þessum tilgangi. Mótefni skulu mælast að lágmarki 0,5 a.e./ml (0,5 IU/ml).

**Flytja má köttinn til Íslands í fyrsta lagi 90 dögum eftir blóðsýnatöku vegna mótefnamælingar með fullnægjandi niðurstöðu.**

Niðurstaða mótefnamælingar gildir svo lengi sem bólusetningu er viðhaldið samkvæmt leiðbeiningum framleiðanda. Rannsóknarniðurstaða skal skráð í heilbrigðis- og upprunavottorð og frumrit rannsóknarskýrslu skal fylgja vottorði.

- **(b) Kattafár (feline panleukopenia), (c) Kattaflensa (feline rhinotracheitis), (d) Kattakvef (feline calicivirus).** Kötturinn skal hafa gilda bólusetningu gegn ofangreindum sjúkdómum, þ.e. hafa hlotið viðeigandi grunnbólusetningu og henni viðhaldið skv. leiðbeiningum framleiðanda bóluefnisins. Síðasta bólusetning skal hafa farið fram a.m.k. 14 sólarhringum fyrir innflutning. Skrá skal eftirfarandi upplýsingar um síðustu gildu bólusetningar í heilbrigðis- og upprunavottorð; heiti bóluefnis, dagsetningu bólusetningar og gildistíma

- **Part 6: Rannsóknir / sýnataka**

- **(a) Blóðrannsókn vegna kattahvítblæðis (*Feline leukemia virus, FeLV*):** Í fyrsta lagi 30 sólarhringum fyrir innflutning skal taka blóðsýni úr kettinum og það rannsakað m.t.t. FeLV. Niðurstaða skal vera neikvæð. Samþykktar rannsóknaraðferðir: PCR, ELISA, IFA. Hraðpróf (test kits) fyrir FIV/FeLV sem dýralæknar geta framkvæmt á spítala eru samþykkt. Neikvæð niðurstaða skal skráð í heilbrigðis- og upprunavottorð og afrit rannsóknarskýrslu á ensku sem inniheldur nafn rannsóknarstofu, örmerki, dagsetningu blóðsýnatöku og niðurstöðu skal fylgja vottorði. Ef hraðpróf er notað skal dýralæknir skrá tegundarheiti og dagsetningu prófs inn á heilbrigðis- og upprunavottorð vottorðið ásamt því að dagsett, undirrituð og stimpluð yfirlýsing dýralæknis um tegundarheiti, dagsetningu prófs/sýnatöku, örmerki og niðurstöðu skal fylgja. Rannsóknarniðurstöðurnar þurfa að vera á ensku.
- **(b) Blóðrannsókn vegna kattaeyðniveiru (*Feline immunodeficiency virus, FIV*):** Í fyrsta lagi 30 sólarhringum fyrir innflutning skal taka blóðsýni úr kettinum og það rannsakað m.t.t. FIV. Niðurstaða skal vera neikvæð. Samþykktar rannsóknaraðferðir: ELISA, Western blot. Hraðpróf (test kits) fyrir FIV/FeLV sem dýralæknar geta framkvæmt á spítala eru samþykkt. Neikvæð niðurstaða skal skráð í heilbrigðis- og upprunavottorð og afrit rannsóknarskýrslu á ensku sem inniheldur nafn rannsóknarstofu, örmerki, dagsetningu blóðsýnatöku og niðurstöðu skal fylgja vottorði. Ef hraðpróf er notað skal dýralæknir skrá tegundarheiti og dagsetningu prófs inn á heilbrigðis- og upprunavottorð vottorðið ásamt því að dagsett, undirrituð og stimpluð yfirlýsing dýralæknis um tegundarheiti, dagsetningu prófs/sýnatöku, örmerki og niðurstöðu skal fylgja. Rannsóknarniðurstöðurnar þurfa að vera á ensku.
- Æskilegt er að sýnataka vegna rannsókna fari fram tímanlega fyrir innflutning þar sem gera þarf ráð fyrir bið eftir niðurstöðum, algengt er að slíkt taki 1-3 vikur. Hentugt er að nýta sömu dýralæknisheimsókn og fyrir fyrri sníkjudýrameðhöndlun.

- **Part 7 a): Fyrri sníkjudýrameðhöndlun:** 21-28 dögum fyrir innflutning skal meðhöndla köttinn gegn sníkjudýrum. Meðhöndlun skal ná til innvortis sníkjudýra; þráðorma, bandorma og útvortis sníkjudýra; lúsa, flóa og stórmítla. [Sjá sérstakar leiðbeiningar um sníkjudýralyf.](#)

- **Part 7 b): Seinni sníkjudýrameðhöndlun:** 5-10 dögum fyrir innflutning skal meðhöndla köttinn gegn sníkjudýrum. Meðhöndlun skal ná til innvortis sníkjudýra; þráðorma, bandorma og útvortis sníkjudýra; lúsa, flóa og stórmítla. [Sjá sérstakar leiðbeiningar um sníkjudýralyf.](#)

- **Part 8 og 9: Heilbrigðisskoðun og útgáfa vottorðs (C2):** 5-10 dögum fyrir innflutning skal kötturinn undirgangast heilbrigðisskoðun; dýralæknirinn skal staðfesta að dýrin séu án ytri sníkjudýra og einkenna smitsjúkdóma. Sérstök skoðun m.t.t. tunguorma (*Linguata serrata*), kláðamítla (*Sarcoptes scabiei* spp.) og húðsveppa (*M. canis*, *M. gypseum*, *T. mentagrophytes* og *T. verrucosum*).

Á sama tíma skal dýralæknirinn gefa út heilbrigðis- og upprunavottorð. Nota skal [vottorðseyðublað C2, Certificate of health and origin for import of a cat to Iceland from a category 2 country](#). Allir reitir í part 1-9 skulu fylltir út, dagsettir og undirritaðir þar sem við á. Niðurstöður rannsókna sem krafist er skulu fylgja með vottorði.

- Part 11 er útfyllt af MAST til staðfestingar á því að innflutningur dýrs hafi hlotið for-samþykki.

#### 4. Vottorð sent til MAST í síðasta lagi 5 dögum fyrir innflutning

- Skannað afrit undirritaðs heilbrigðis og upprunavottorðs (C2) ásamt rannsóknarniðurstöðum sem við á skal sent MAST til yfirferðar og samþykkis [í síðasta lagi 5 sólarhringum fyrir áætlaðan komudag kattar](#).
- Gögnin skulu send sem viðhengi með tölvupósti til [petimport@mast.is](mailto:petimport@mast.is)
- [Berist gögnin síðar en 5 dögum \(sólarhringum\) fyrir áætlaðan komudag er stofnuninni heimilt að synja innflutningi](#).
- Gögn vegna innflutnings dýra eru yfirfarin á virkum dögum, á afgreiðslutíma MAST.
- Ef ekki eru gerðar athugasemdir við heilbrigðis- og upprunavottorð, er það undirritað og staðfest af MAST og tilkynning þess efnis send innflytjanda.

#### 5. Flutningur kattar til Íslands / flutningsbúr / fylgigögn

- Gera skal ráðstafanir vegna flutnings kattar til Íslands með góðum fyrirvara.
- Taka skal tillit til bólusetninga og mótefnaþæfingar m.t.t. tímafresta þegar innflutningsdagsetning er ákvörðuð.
- Eingöngu er heimilt að flytja ketti til landsins með flugi og Keflavíkurlugvöllur er eini samþykkti innflutningsstaðurinn fyrir gæludýr.
- Ef millilenda þarf með köttinn á leiðinni frá útflutningslandi til Íslands, skal innflytjandi kanna hvaða innflutningsskilyrði gilda í viðkomandi landi.
- Flugnúmer, komudag og komutíma skal skrá í heilbrigðis- og upprunavottorð.
- Flutningsbúrið skal uppfylla IATA kröfur og vera nógu stórt til þess að kötturinn geti staðið í því, legið og snúið sér við. Búrið á að vera úr hörðu efni sem ekki getur fallið saman og sem auðvelt er að þrífa og sótthreinsa. Ef ekki er hægt að þrífa og sótthreinsa búrið verður því fargað að loknum innflutningi. Mjúk búr eða töskur eru ekki leyfilegar. Nánar má sjá um kröfur til flutningsbúra fyrir gæludýr í [reglugerð nr. 80/2016](#) um velferð gæludýra.
- Leyfilegur komutími dýra er á milli kl. 06:00 og 17:00 á fyrirfram ákveðnum komudögum. Ef koma utan þess tíma er nauðsynleg þarf að hafa samband við einangrunarstöðina. Gæludýrum er ekki leyft að dvelja á flugvöllinum yfir nótt.
- Eftirfarandi gögn skulu fylgja kettinum til Íslands (í umslagi sem límt er á búrið)
  - Innflutningsleyfi (má vera afrit)
  - [Frumrit](#) heilbrigðis- og upprunavottorðs (C2)
  - [Frumrit](#) (eða staðfest afrit) rannsóknarskýrslu vegna hundaæðismótefnaþæfingar
  - [Frumrit](#) (eða staðfest afrit) rannsóknarskýrslu annarra rannsókna (FIV/FelV)
  - Tollskýrsla. Hafi eigandi átt dýrið skemur en 12 mánuði ber honum að greiða virðisaukaskatt af kaupverði dýrsins við innflutning. Innflytjendum er skylt að leggja fram tollskýrslu hjá tollstjóra, þ.á.m. vörureikning þar sem fram koma upplýsingar um nöfn og heimili seljanda og kaupanda, útgáfustað- og dag og hvenær sala fór fram. Ganga skal frá greiðslu áður en dýrið er útskrifað úr einangrun. Vinsamlegast hafið samband við Miðlun hjá Icelandair Cargo ehf. í tollskýrslu@icelandaircargo.is. Hafi innflytjandi átt dýrið lengur en 12 mánuði gæti hann þurft að leggja fram gögn því til staðfestingar.

#### 6. Innflutningseftirlit og flutningur í einangrunarstöð.

Við komu til Keflavíkurlugvallar eru kettir fluttir rakiðis í móttökustöð gæludýra þar sem innflutningseftirlit fer fram. Eftirlitið felst í því að sannreyna örmerkisnúmer kattarins, að öll tilskilin gögn fylgi kettinum og að hann hafi ekki augljós einkenni smitsjúkdóms. Komi upp athugasemdir við innflutningseftirlit er haft samband við innflytjanda símleiðis. Að loknu innflutningseftirliti eru kettir afhentir flutningsaðila viðkomandi einangrunarstöðvar sem flytur þá í einangrunarstöð.

## 7. Óheimill innflutningur

Óheimilt er að flytja til landsins:

- Kettlingafullar læður og læður með kettlinga á spena.
- Ketti sem hafa slasast eða undirgengist aðgerðir fyrir innflutning, allt fram að innflutningsdegi, og/eða þarfnast aukins eftirlits eða eftirmeðferðar af nokkru tagi, nema með sérstöku leyfi Matvælastofnunar.

## 8. Nánari upplýsingar um innflutning katta

- Matvælastofnun, Inn- og útflutningsdeild að Laugavegi 166, 105 Reykjavík (s. 530 4800) fer með eftirlit með innflutningi dýra.
- Allar nauðsynlegar upplýsingar um innflutningsskilyrði er að finna á [vef MAST](#).
- Varðandi meðhöndlun, sýnatökur o.þ.h. fyrir hvern kött skal leita ráða hjá dýralækni kattarins og hafa til hliðsjónar [vottorðseyðublað C2](#) og [ensku útgáfu leiðbeininga þessara](#).
- Einangrunarstöðvar veita upplýsingar um bókanir og kostnað við einangrun.
- Gögn vegna innflutnings skal senda á [petimport@mast.is](mailto:petimport@mast.is)

## YFIRLIT YFIR BÓLUSETNINGAR, SÝNI OG MEÐHÖNDLUN VEGNA INNFLUTNINGS Á KETTI FRÁ LANDI Í LANDAFLOKKI 2

Bólusetn./sýni/meðhöndlun (tilvísun í vottorð)	Tímasetning miðað við innflutning	Athugasemd
Rabies bólusetning (5a)	Bólusetja í síðasta lagi <b>120 dögum</b> fyrir innflutning.	Bólusetning skal vera í gildi, þ.e. ekki útrunnin.
Rabies mótefnamæling (5a)	Blóðsýnataka í fyrsta lagi <b>30 dögum</b> eftir bólusetningu. <b>Flytja má köttinn inn í fyrsta lagi 90 dögum eftir blóðsýnatöku með fullnægjandi niðurstöðu.</b>	Niðurstaða $\geq 0,5$ ae/ml Rannsóknarstofa skal vera viðurkennd af ESB.
Feline panleukopenia (5b)	Síðasta bólusetning eigi síðar <b>en 14 dögum</b> fyrir innflutning.	Bólusetningarnar skulu vera í gildi, þ.e. ekki runnar úr skv. upplýsingum í heilsufarsbók.
Feline rhinotracheitis (5c)		
Calicivirus (5d)		
FeLV (6a)	Blóðsýnataka í fyrsta lagi <b>30 dögum</b> fyrir innflutning.	Niðurstaða skal vera neikvæð. ATH! Gera skal ráð fyrir 1-3 vikna bið eftir niðurstöðu.
FIV (6b)	Blóðsýnataka í fyrsta lagi <b>30 dögum</b> fyrir innflutning.	Niðurstaða skal vera neikvæð. ATH! Gera skal ráð fyrir 1-3 vikna bið eftir niðurstöðu.
Fyrri sníkjudýrameðhöndlun (7a)	Meðhöndlun <b>21-28 dögum</b> fyrir innflutning	Meðhöndla skal fyrir innvortis og útvortis sníkjudýrum.
Seinni sníkjudýrameðhöndlun seinni (7b)	Meðhöndlun <b>5-10 dögum</b> fyrir innflutning	Meðhöndla skal fyrir innvortis og útvortis sníkjudýrum.
Heilbrigðisskoðun og útgáfa vottorðs (8-9)	<b>5-10 dögum</b> fyrir innflutning	Passa að vottorð sé rétt útfyllt og að allar rannsóknarniðurstöður fylgi.
Sendu afrit af vottorði til MAST – <a href="mailto:petimport@mast.is">petimport@mast.is</a>	<b>Í síðasta lagi 5 dögum</b> fyrir innflutning.	Sendu skal skannað afrit af fullkláruðu vottorði ásamt rannsóknarniðurstöðum.